

**Toshkent davlat yuridik universitetida korrupsiyaviy holatlar haqida
xabardor qilish to'g'risida
NIZOM**

I bob. Umumiy qoidalar

1. Mazkur Nizom talablari egallab turgan lavozimi va bajaradigan vazifa va funksiyalaridan qat'i nazar Toshkent davlat yuridik universiteti (keyingi o'rinlarda – universitet) va universitet huzuridagi muassasalar bilan mehnat va fuqarolik shartnomaviy munosabatlarida bo'lgan barcha xodimlarga, shuningdek talabalar, o'quvchilar va doktorantlarga nisbatan tatbiq etiladi.

2. Universitet va universitet huzuridagi muassasalar xodim, talaba, o'quvchi va doktorantlari va boshqa shaxslar, agar ular ta'lim muassasasi xodim, talaba, o'quvchi va doktorantlari xatti-harakatlarining qonunga muvofiqligi to'g'risida shubhaga borsalar, korrupsiya, manfaatlar to'qnashuvi bilan bog'liq va boshqa huquqbuzarlik holatlari sodir etilishiga doir asosli va haqqoniy ma'lumot va faktlarga ega bo'lsalar, shuningdek ular bunday huquqbuzarlik sodir etilishiga og'dirilsalar ular bu haqda universitet va universitet huzuridagi muassasalari rahbarlariga, Korrupsiyaga qarshi ichki nazorat bo'limi (keyingi o'rinlarda – maxsus bo'lim)ga yoki Universitetning Korrupsiyaga qarshi kurashish bo'yicha Komissiyasiga, bevosita yozma yoki tegishli aloqa kanallari orqali xabar berishlari shart.

3. Universitet va universitet huzuridagi muassasalar xodim, talaba, o'quvchi va doktorantlari tomonidan mazkur Nizom 2-bandi talablariga amal qilinmasligi ularga nisbatan universitet Ichki tartib qoidalari va O'zbekiston Respublikasining Mehnat kodeksiga binoan intizomiy chora ko'rish uchun asos bo'lib xizmat qiladi.

**II bob. Korrupsiya, manfaatlar to'qnashuvi bilan bog'liq huquqbuzarliklar sodir etishga
og'dirish maqsadida murojaat qilish holatlari haqida xabardor qilish bilan bog'liq ishlarni
tashkil etish**

4. Korrupsiya, manfaatlar to'qnashuvi bilan bog'liq holatlar haqida xabardor qilishga oid faoliyatni tashkil etish universitet rahbariyati va maxsus bo'lim zimmasiga yuklatiladi.

5. Maxsus bo'lim hamda universitet rahbariyati korrupsiya va manfaatlar to'qnashuvi bilan bog'liq holatlar haqida xabardor qilish yuzasidan o'z faoliyatlarini tashkil etganda universitetning korrupsiyaga qarshi kurashish siyosati va mazkur Nizom qoidalariga qat'iy rioya qilishlari lozim.

III bob. Korrupsiya, manfaatlar to'qnashuviga oid holatlar haqida xabar berish tartibi

6. Korrupsiya va manfaatlar to'qnashuviga oid xabarlar quyidagi mas'ullar va tuzilmalar hamda aloqa kanallari orqali beriladi:

universitet rektori va universitet huzuridagi muassasalari rahbarlariga og'zaki hamda yozma shaklda;

Universitetning korrupsiyaga qarshi kurashish bo'yicha komissiyasiga yozma shaklda;
maxsus bo'limga to'g'ridan-to'g'ri, yozma yoki og'zaki shaklda;
maxsus bo'limning telegram ijtimoiy tarmog'idagi boti orqali;
universitet va uning huzuridagi muassasalarning web-sayti, telegram-botlari va ijtimoiy tarmoqdagi sahifalari orqali;
universitetning ishonch va boshqa telefonlari orqali;
Universitet va uning muassasalarining elektron pochta manzillari orqali;
to'g'ridan-to'g'ri huquqni muhofaza qilish organlariga.

7. Universitet va universitet huzuridagi muassasalarining aloqa kanallariga kelib tushgan barcha xabarlar O'zbekiston Respublikasi qonunchilik hujjatlari va ichki hujjatlarga muvofiq xolisona va o'z vaqtida ko'rib chiqiladi.

8. Ijtimoiy tarmoqlar yoki boshqa kanallar orqali anonim tarzida berilgan, shuningdek, korrupsiyaviy huquqbuzarlikni sodir etayotgan shaxs va manfaatlar to'qnashuvi haqidagi ma'lumotlar aniq ko'rsatilmagan xabarlar huquqiy ahamiyat kasb etmaydi.

IV bob. Korrupsiya, manfaatlar to'qnashuviga oid xabar bergan shaxslar huquqlarini himoya qilish

9. Universitet va universitet huzuridagi muassasalar o'z vakolatlari va mavjud imkoniyatlari doirasida ta'lim muassasasining mansabdor shaxslari, xodim, talaba, o'quvchi va doktorantlar hamda ularning yaqin qarindoshlari va kontragentlar tomonidan ta'lim muassasasi faoliyati bilan bevosita bog'liq huquqbuzarliklar hamda manfaatlar to'qnashuvi to'g'risida ishonchli ma'lumot berilganida ushbu shaxslar haqidagi ma'lumotlarni maxfiyligini ta'minlaydilar (qonunchilikda nazarda tutilgan hollar bundan mustasno).

10. Universitet va universitet huzuridagi muassasalari o'z xodim, talaba, o'quvchi va doktorantlarining qonuniy manfaatlarini himoya qiladilar.

11. Universitet va universitet huzuridagi muassasalarining korrupsiyaga qarshi lokal hujjatlari talablarini buzish ehtimoli haqida xabar bergan shaxslarni ta'qib qilinishiga qaratilgan harakatlarga, shu jumladan ishdan bo'shatish, lavozimini pasaytirish, kamsitish, bosim o'tnukazish va ta'lim muassasasidan chetlashtirishga yo'l qo'yilmasligini kafolatlaydilar.

V bob. Korrupsiya, shu jumladan manfaatlar to'qnashuviga oid huquqbuzarlik haqidagi xabarga qo'yilgan talablar

12. Xabar yozma tarzda taqdim etilganda murojaatchi tomonidan imzolanib maxsus bo'lim yoki universitet yoxud universitet huzuridagi muassasalar rahbarlariga topshiriladi.

13. Arizada quyidagi ma'lumotlar bo'lishi shart:
ariza muallifining FISH, lavozimi (kursi, guruhi va yo'nalishi);
shaxsning murojaat qilishi uchun unga ma'lum bo'lgan holatlarning tavsifi (sana, joy, vaqt va boshqa holatlar);

korrupsiyaviy huquqbuzarlik sodir etishi yuzasidan og'dirish turi va uni og'dirgan shaxs to'g'risidagi ma'lum bo'lgan barcha ma'lumotlar (FISH, lavozimi yoki kursi, guruhi, yo'nalishi);

korrupsiyaviy huquqbuzarlik taklifiga rad javobi (rozilik) bildirilganligi to'g'risidagi ma'lumot;

murojaat qilingan sana;

murojaatchi imzosi va telefon raqami.

14. Murojaatchi o'z murojaatiga asos bo'lgan ma'lumotlarni qo'shib taqdim etishi mumkin.

VI bob. Korruptsiya, manfaatlar to'qnashuviga oid xabarni rasmiylashtirish tartibi

15. Korruptsiya, manfaatlar to'qnashuviga oid holatlar haqidagi murojaatlar Korruptsiyaga oid huquqbuzarliklar to'g'risidagi xabarlarni qayd etish daftarida ro'yxatga olinadi.

16. Korruptsiyaga oid huquqbuzarliklar to'g'risidagi xabarlarni qayd etish daftari varaqlariga raqam qo'yilib, universitet rektori va universitet huzuridagi muassasalar rahbarlari imzosi va muassasa muhri bilan tasdiqlanadi.

17. Murojaatchi xozir bo'lganda yolg'on xabar berganlik hamda tuhmat qilganlik uchun belgilangan tartibda jinoiy hamda ma'muriy javobgarlik mavjudligi haqida ogohlantiriladi hamda ushbu ariza murojaat qilingan kun Korruptsiyaga oid huquqbuzarliklar to'g'risidagi xabarlarni qayd etish daftariga mazkur Nizomning ilovasida belgilangan tartibda rasmiylashtiriladi va ariza nusxasiga arizaning qabul qilinganligi to'g'risidagi belgi qo'yilib murojaatchiga topshiriladi.

18. Elektron ko'rinishda berilgan xabarlar ham yuqoridagi tartibda yozma ariza mazmuni va shakliga qo'yilgan talablarga amal qilingan holda taqdim etiladi va mazkur ariza yuzasidan ham maxsus bo'lim mas'ul xodimi murojaatchi bilan murojaat qilingan kun bog'lanib yolg'on xabar berganlik hamda tuhmat qilganlik uchun belgilangan tartibda jinoiy hamda ma'muriy javobgarlik mavjudligi haqida ogohlantiriladi hamda darhol elektron ko'rinishdagi arizani Korruptsiyaga oid huquqbuzarliklar to'g'risidagi xabarlarni qayd etish daftariga ushbu Nizomning ilovasida belgilangan tartibda rasmiylashtiradi va arizaning qabul qilinganligi to'g'risidagi ma'lumotni arizachiga yetkazadi.

19. Xabarlardagi korruptsiyaga oid huquqbuzarliklar to'g'risida bildirilgan ma'lumotlarning maxfiyligi kafolatlanadi.

VII bob. Korruptsiya, manfaatlar to'qnashuviga oid xabarni mas'ullarga yetkazish va xizmat tekshiruvi o'tkazish tartibi hamda muddatlari

20. Korruptsiyaga va (yoki) manfaatlar to'qnashuviga oid xabar maxsus bo'lim tomonidan tegishincha rektorga, universitet huzuridagi muassasalar rahbarlariga zudlik bilan ma'lum qilinadi.

21. Korruptsiyaga va (yoki) manfaatlar to'qnashuviga oid xabar yuzasidan, qonunchilikda belgilangan tartibda va muddatlarda ko'rib chiqish uchun tegishli choralar ko'riladi.

22. Korruptsiyaga va (yoki) manfaatlar to'qnashuviga oid xabar universitet yoxud universitet huzuridagi yoki maxsus bo'lim rahbarlari tomonidan dastlabki tarzda ko'rib chiqilishi natijasiga ko'ra quyidagi qarorlardan biri qabul qilinadi:

agar mazkur masala yuzasidan avval ham murojaat kelib tushgan bo'lib ushbu murojaatdagi holatlar o'z tasdig'ini topmagan bo'lsa, arizani rad etish to'g'risida;

korruptsiya, manfaatlar to'qnashuviga oid xabar yuzasidan xizmat tekshiruvi o'tkazish to'g'risida;

korruptsiya, manfaatlar to'qnashuviga oid xabarni huquqni muhofaza qiluvchi organga taqdim etish to'g'risida.

23. Rektorning buyrug'i asosida korrupsiya, shu jumladan manfaatlar to'qnashuviga oid huquqbuzarliklar to'g'risidagi xabar yuzasidan maxsus bo'lim tomonidan xizmat tekshiruvi o'tkaziladi.

24. Xabarda ko'rsatilgan ma'lumotlar yuzasidan maxsus bo'lim tomonidan o'tkazilgan xizmat tekshiruvi natijasida korrupsiya, shu jumladan manfaatlar to'qnashuviga oid huquqbuzarlik holatlari mavjudligi aniqlanganda, bu haqda rektorga yoki universitet muassasalari rahbarlariga bir ish kuni davomida ma'lum qilinadi.

25. Xizmat tekshiruvi amalga oshirilishi jarayonida maxsus bo'lim quyidagi huquqlarga ega:

xodim, talaba, o'quvchi va doktorant va boshqa shaxslar bilan suhbat o'tkazish;

xodim, talaba, o'quvchi va doktorant va boshqa shaxslar tomonidan taqdim etilgan ma'lumotlarni o'rganish va ular yuzasidan tushuntirishlar olish va boshqalar.

26. Ariza kelib tushgan kundan e'tiboran o'n besh kun ichida, qo'shimcha o'rganish va (yoki) tekshirish, qo'shimcha hujjatlarni so'rab olish talab etilganda esa, bir oygacha bo'lgan muddatda ko'rib chiqiladi.

27. Ariza va shikoyatlarni ko'rib chiqish uchun tekshirish o'tkazish, qo'shimcha materiallarni so'rab olish yoxud boshqa chora-tadbirlar ko'rish zarur bo'lgan hollarda, ularni ko'rib chiqish muddatlari tegishli Universitet rektori, Universitet muassasalari rahbarlari tomonidan istisno tariqasida uzog'i bilan bir oyga uzaytirilishi mumkin, bu haqda murojaat etuvchiga xabar qilinadi.

28. Xizmat tekshiruvi natijalari yuzasidan yozma xulosa tayyorlanib unda quyidagilar ko'rsatiladi:

taqdim etilgan ma'lumotlar yuzasidan o'rganish natijalari;

murojaatni tasdiqlovchi yoki rad etuvchi asoslar; murojaat yuzasidan ko'rilgan ta'sir choralari;

murojaat yuzasidan aniqlangan sabab va sharoitlar yuzasidan amalga oshiriladigan aniq chora-tadbirlar.

29. Maxsus bo'lim tomonidan xabarlarni ko'rib chiqish natijalari va qo'llanilgan ta'sir choralari ko'rsatilgan javob xati tayyorlanib arizachiga yuboriladi (taqdim etilgan aloqa ma'lumotlari bo'yicha yozma yoki elektron shaklda).

Shuningdek, qonunchilikda boshqacha tartib belgilanmagan bo'lsa, aniqlangan holatlar to'g'risida bunday toifadagi huquqbuzarliklarni ko'rib chiqish vakolatiga ega huquqni muhofaza qiluvchi organlarga xabar beriladi.

30. Agar arizada keltirilgan xabarlarda korrupsiya, shu jumladan manfaatlar to'qnashuviga oid huquqbuzarlik belgilari mavjud emas deb hisoblansa, bu haqda arizachiga ma'lum qilinadi.

Ushbu holat arizachini vakolatli huquqni muhofaza qiluvchi organlarga murojaat qilish huquqidan mahrum etmaydi.

31. Universitet hamda universitet muassasalari mazkur turdagi huquqbuzarliklar yuzasidan jinoyat ishini qo'zg'atishga yoxud ma'muriy javobgarlikka tortish uchun asoslar mavjudligi yoki mavjud emasligiga baho bermaydi.

VIII bob. Korrupsiya, shu jumladan manfaatlar to'qnashuviga oid huquqbuzarlik haqida xabar bergan shaxslarni rag'batlantirish

32. Universitet va universitet muassasalaridagi korrupsiya, manfaatlar to'qnashuviga oid huquqbuzarliklar to'g'risida xabar bergan shaxslarni rag'batlantirish haqiqatda korrupsiya fakti

arizachi tomonidan taqdim etilgan dalil (audioyozuv, videoyozuv, sms xabar, foto va hokazo)larga asosan maxsus bo'lim tomonidan o'rganilishi jarayonida shubha uyg'otmagan taqdirda yoki tegishli tartibda vakolatli sud va huquqni muhofaza qiluvchi organlar tomonidan tasdiqlangandagina amalga oshiriladi.

33. Korrupsiya, manfaatlar to'qnashuviga oid huquqbuzarliklar to'g'risida xabar bergan shaxslarni rag'batlantirish to'g'risida maxsus bo'lim rahbari tomonidan tegishincha universitet rektori yoki universitet muassasalari rahbarlari nomiga tegishli tartibda taqdimnoma kiritiladi.

34. Rag'batlantirish qonunchilik hujjatlari va ichki hujjatlarga muvofiq amalga oshiriladi.

IX bob. Yakunlovchi qoida

35. Nizomga tegishli o'zgartish va qo'shimchalar kiritish Universitet hamda uning muassasalari Kengashlari tomonidan amalga oshiriladi.

TDYU xodim, talaba, o'quvchi va doktorantlari
 tomonidan korrupsiyaviy huquqbuzarliklar sodir
 etishga og'dirish maqsadida murojaat qilish
 holatlari haqida xabardor qilish to'g'risida
 nizomga ilova

**Korrupsiya va manfaatlar to'qnashuviga oid uquqbuzarliklar to'g'risidagi xabarlarini qayd etish
 daftari**

T/r	Murojaatchi F.I.Sh. Xabar kelib tushgan kanal Bog'lanish uchun ma'lumotlar	Murojaat qisqacha mazmuni	Murojaatni qabul qilib olgan mas'ul shaxs F.I.Sh. va lavozimi	Yolg'on xabar berganlik hamdatuhmat qilganlik uchun javobgarlik mavjudligi haqida ogohlantirilganligi	Murojaat qabul qilib olingan sana	Murojaatchiga ariza qabul qilinganligi to'g'risidagi ariza nusxasining berilganligi
1.						
2.						
3.						
...						